


Tacheles: Flécken am Numm vun der Ëmwelt & dem sozialen Zesummenhalt



vun Chaos Computer Club Lëtzebuerg den 05/11/2017



Op ee well oder net, hänkt all Mënsch sech fréier oder spéider un déi eng oder aner Saach. A wann et och nëmme déi éischt Buermaschinn ass, mat där een seng éischt Wunneng renovéiert huet an déi engem laang a gutt gedéngt huet. Iergendwann kënnt dann awer de Moment, wou se de Geescht wäert opginn, an een net weess wien hautzedaags sou eppes nach gefléckt kritt.

Beim Repair Café geet et genau dorëms: hei versiche fräiwëlleg Elektriker, Mechaniker, Informatiker, Néieschen, Auermécher, an nach vill weider Berufssparten, de Saachen nees en zweet oder drëtt Liewen ze schenken.

Dëst geschitt awer net am stillen Kämmerlein, allerdéngs mat de Besëtzer vun de Saachen zesummen. Der Philosophie vum Repair Café no, sollt nämlech och deen dee net an der Reparatur bewandert ass, d'Chance kréien sech um Prozess vun der Reparatur ze bedeelegen.

Meeschtens ass et och esou, dass et net ausbléift dass den Aparillo ausernee geschrauft gëtt an et seng Zäitche braucht bis ee genau weess u wat de Problem dann elo genau hänkt.

Beschte Falls kritt een d'Saach erëm un d'goen, anerersäits bléift soss dann awer nëmmen de Wee op de Recycling – wann et net dach nach d'Méiglechkeet gëtt aner Stécker ze recuperéiere fir erëm villäicht anerwäerts anzesetzen.

Gefléckt gëtt prinzipiell alles soulaang et och Géigestänn sinn déi een och op déi jeeweileg Plaz erakritt. Fir deen dee sech net sécher op en déi eng oder aner Saach matbrénge soll, kann déi Persoun sech gäre bei eis am Virfeld mellen.

Iwwert Eis

De Repair Café entsteet am Fong enger Iddi aus Holland, déi mir einfach op eisem Deel vun der Weltkaart weidergesponnen hunn; an dat, zu eiser Freed, mat grousem Erfolleg.

Et ass keen Evenement deen net gutt besicht ass, oder wou een net ëmmer erëm op een Neits de Saz ze héiere kritt: “Schéin ze gesinn, dass et nach Leit wéi Äerch gëtt, déi et nach flécke wëllen!”

Sou geet et beim Repair Café net nëmmen drëms de Saachen en neit Liewen ze schenken, ma virun allem och ëm Ëmweltschutz an de Konsum u sech. Well deen dee seng Saache lokal flécke léisst, sou manner keeft an sech fir eng propper Entsuegung asetzt, falls dach Mol eppes sollt futti goen, mécht der Ëmwelt, der lokaler Wirtschaft an der Gesellschaft en Générale ee grouse Gefalen.

Dowéinst flécke mär och am Numm vun der Ëmwelt an dem sozialen Zesummenhalt!

Weider Informatiounen iwwert wee mär sinn a wou där eis untreffe kënt op www.repaircafe.lu

Am Tacheles gi mer Persounen d'Méiglechkeet, sech zu engem Thema fräi ze äusseren. Dobäi gräift d'Redaktioun net inhaltlech an. D'Auteure sinn eleng fir hier Positiounen verantwortabel.

ÄHNLECH SUJETEN [Digital](#), [Digitalisierung](#), [Tacheles](#)

Chaos Computer Club Lëtzebuerg

De Chaos Computer Club Lëtzebuerg gëtt et säit 2008. E setzt sech fir den Dateschutz a fir eng transparent Regierung an.